



Broj: IP-03-47-5-07381/12VT  
Banja Luka, 13.8.2012. godine

Institut za intelektualno vlasništvo Bosne i Hercegovine (u daljem tekstu: Institut), na osnovu člana 11. a u vezi sa članom 44. Zakona o kolektivnom ostvarivanju autorskog i srodnih prava („Službeni glasnik BiH“ broj 63/10), čl. 114. i 193. stav (1) Zakona o upravnom postupku („Službeni glasnik BiH“ br. 29/02, 12/04, 88/07 i 93/09), postupajući po službenoj dužnosti, d o n o s i

## **R J E Š E N J E**

### **o oduzimanju dozvole za ostvarivanje prava radiodifuznih organizacija**

1. **ODUZIMA SE dozvola** „Elta-kabel“ d.o.o. Preduzeću za prenos zvuka, slike ili ostalih informacija kablovima, Doboju, Ulica svetog Save broj 26, koju je izdao Institut za standarde, mjeriteljstvo i intelektualno vlasništvo Bosne i Hercegovine Rješenjem broj IP-3905/06-04 VL od 6.6.2006. godine, u dijelu koji se odnosi na obavljanje djelatnosti ostvarivanja prava radiodifuznih organizacija.
2. Dozvola za obavljanje djelatnosti ostvarivanja prava radiodifuznih organizacija oduzima se sa danom **11.8.2012. godine**.
3. Preduzeće „Elta-kabel“ d.o.o. dužno je da dostavi Institutu izvještaj o poslovanju, raspodjeli i utrošku sredstava zaključno sa danom važenja dozvole, u zakonskom roku.
4. Preduzeće „Elta-kabel“ d.o.o. dužno je da organizaciji koja dobije dozvolu za kolektivno ostvarivanje prava radiodifuznih organizacija ustupi svu relevantnu dokumentaciju neophodnu za obavljanje ove djelatnosti u roku od 30 dana od dana izdavanja dozvole.
5. Ovo rješenje objaviti u „Službenom glasniku BiH“ i u „Službenom glasniku Instituta“.

### **Obrazloženje**

Institut za standarde, mjeriteljstvo i intelektualno vlasništvo Bosne i Hercegovine, pravni prethodnik Instituta za intelektualno vlasništvo Bosne i Hercegovine, Rješenjem broj IP-3905/06-04VL od 6.6.2006. godine izdao je „Elta-kabel“ d.o.o. Doboju - Preduzeću za prenos zvuka, slike ili ostalih informacija kablovima, odobrenje za obavljanje djelatnosti ostvarivanja autorskog prava i prava radiodifuznih organizacija.

U postupku po zahtjevu Asocijacije kompozitora – muzičkih stvaralaca BiH (AMUS) iz Sarajeva, Obala Kulina bana broj 22/II, za dodjelu dozvole za kolektivno ostvarivanje autorskih muzičkih prava Institut je Rješenjem broj IP-03-47-5-12-06059/12VT od 21.6.2012. godine oduzeo dozvolu preduzeću „Elta-kabel“ d.o.o. Doboju za obavljanje djelatnosti ostvarivanja autorskog prava.

Zakonom o kolektivnom ostvarivanju autorskog i srodnih prava („Službeni glasnik BiH“ broj 63/10), koji je stupio na snagu 11.8.2010. godine, dozvoljen je nastavak rada postojećim kolektivnim organizacijama pod uvjetima utvrđenim članom 44. Naime, navedenim članom u stavu (1) Zakona propisano je da organizacije autora i drugih nosilaca autorskih prava, te druga pravna lica specijalizirana za ostvarivanje autorskih prava koja su, prema odredbi člana 87. Zakona o autorskom pravu i srodnim pravima u Bosni i Hercegovini („Službeni glasnik BiH“ br. 7/02 i 76/06), obavljala poslove kolektivnog ostvarivanja autorskog prava prije stupanja na snagu ovog zakona nastavljaju da rade i poslije stupanja na snagu

ovog zakona. Stavom (2) istog člana predviđeno je da su svi subjekti iz prethodnog stava dužni da usklade svoj statusni oblik i svoje poslovanje sa odredbama zakona i podnesu zahtjev za izdavanje nove dozvole za obavljanje poslova kolektivnog ostvarivanja autorskog i srodnih prava u roku od dvije godine od stupanja na snagu ovog zakona.

Poslovanje „Elta-kabel“ d.o.o. bilo je predmet analize u okviru Izvještaja o funkcioniranju sistema kolektivnog ostvarivanja autorskog i srodnih prava u Bosni i Hercegovini u periodu od 2005. do 2010. godine, koji je usvojila Parlamentarna skupština Bosne i Hercegovine, na sjednici Predstavničkog doma održanoj 19.4.2012. godine i sjednici Doma naroda održanoj 15.5.2012. godine. U Izvještaju je, između ostalog, konstatirano da je preduzeće „Elta-kabel“ d.o.o. poslovalo kao zastupnik - agent AGICOA za koje nije potrebna dozvola za kolektivno ostvarivanje autorskog i srodnih prava, da nije obavljalo poslove kolektivnog ostvarivanja prava za koje je dobilo dozvolu od Instituta, da nije moguće dati ocjenu poslovanja ovog preduzeća sa stanovišta normi koje reguliraju kolektivno ostvarivanje autorskog i srodnih prava, te da je, imajući u vidu dosadašnje poslovanje ovog preduzeća i novi zakonski okvir, neophodno preispitati da li ima potrebe da se preduzeće bavi poslovima kolektivnog ostvarivanja autorskog prava.

Nesporno je da je preduzeće „Elta-kabel“ d.o.o. dužno da izvrši isplate prikupljenih sredstava svim nosiocima čija je prava ostvarivalo za period do kojeg je imalo važeću dozvolu, te da je dužno sve relevantne podatke i dokumentaciju koji su neophodni za obavljanje poslova ustupiti novoj kolektivnoj organizaciji koja će ostvarivati ova prava.

S obzirom na to da preduzeće „Elta-kabel“ d.o.o. nije prilagodilo svoj statusni oblik prema Zakonu o kolektivnom ostvarivanju autorskog i srodnih prava i da nije podnijelo zahtjev za obnovu dozvole u zakonskom roku, koji je istekao 11.8.2012. godine, kojim bi dokazalo da ispunjava uvjete propisane zakonom, a imajući u vidu zaključke Parlamentarne skupštine Bosne i Hercegovine, odlučeno je kao u dispozitivu ovog rješenja.

Prema članu 13. stav (4) Zakona o kolektivnom ostvarivanju autorskog i srodnih prava, obavještenje o odluci o oduzimanju dozvole objavljuje se u „Službenom glasniku BiH“ i u „Službenom glasniku Instituta“, te je odlučeno kao u tački 5. ovoga rješenja.

**Pouka o pravnom lijeku:** Ovo rješenje je konačno u upravnom postupku. Protiv ovog rješenja može se pokrenuti upravni spor podnošenjem tužbe Sudu Bosne i Hercegovine u roku od 60 dana od dana prijema rješenja.

Direktorica  
Instituta za intelektualno vlasništvo  
Bosne i Hercegovine  
Lidija Vignjević